

法苑珠林

才四十三

四百八十五
漆三

51421



元祿九年丙子二月日重脩

皇圖鞏固 帝階綴昌

佛日增輝 懋輪常轉

山城州天安寺法金剛院置

法苑珠林卷第四十三

漆

大唐上都西明寺沙門釋道世字玄暉撰

輪王篇第四十

此有五部

述意部

會名部

七寶部

頂生部

育王部

述意部第一

蓋聞飛行黃帝統御四洲邊鄙逆命則七寶

威伏十善引化則千子感現囊括遐

迹獨處

中原發慈父之撫育感赤子之忠臣

世居久

遠貪逸弥繁峻極威戎遠思天報於是行轉

輪之猛騰帝釋之宮面度非分退失輪王之

位懷悲苦切劇同荼炭之殃哀斯痛矣深可

嗟乎

會名部第二

依真諦三藏法師

云於成劫時人壽無量歲於住劫時人壽八
萬歲時有輪王出世若減不出輪王有三一
軍輪王二財輪王三法輪王若減八萬財輪
王不出世所以然者此王福德壽命長遠即
與壽相違故不出世若減法輪王出世所以
然者如來大悲令諸衆生知苦無常易可化
故出世也故論云劫減佛興世劫初轉輪王
唯彌勒佛出世時人民福德二王俱出世也
財有四一金輪王則化被四天下二銀輪王
則政隔北鬱單王三天下三銅輪王則除北
鬱單及西俱耶厘王二天下四鐵輪王則唯
局閻浮提王一天下若減八萬歲時有軍輪

王出以軍威伏王一天下即是阿育王等如
來為法輪王言劫增轉輪王者此據財輪王
也若論軍輪故通劫減鐵輪有二百五十輻
銅輪有五百輻銀輪有七百五十輻金輪有
千輻故仁王經云道種堅德王乘金輪王四
天下性種性王乘銀輪王三天下習種性王

乘銅輪王二天下以上十善得王乘鐵輪王
一天下
七寶部第三 如長阿含經云

佛告比丘世間有轉輪聖王成就七寶有四

神德云何成就七寶一金輪寶二白象寶三

紺馬寶四神珠寶五玉女寶六居士寶

餘經
名典

財七主兵寶云何金輪寶成就若轉輪聖王

出閻浮提地利利水澆頭種以十五日滿
時沐浴香湯上高殿上與綵女衆共相娛樂
天金輪寶忽現在前輪有千輻光色具足天
金所成天匠所造非世所有輪徑丈四輪王
見已默自念言我曾從先宿諸舊聞如是語
若刹利王水澆頭種以十五日滿時沐浴
香湯外法殿上綵女圍遶自然金輪忽現在
前輪有千輻光色具足天匠所造非世所有
輪徑丈四是則名爲轉輪聖王今此輪現將
無是耶我今寧可試此輪寶時王即召四兵
向金輪寶偏露右臂右膝著地以右手摩捫
金輪語言汝向東方如法而轉勿違常則輪

即東轉時王即將四兵隨其後行輪所住處
王即止駕尔時東方諸小王見大王至以金
鉢盛銀粟銀鉢盛金粟來詣王所拜首白言
善哉大王今此東方土地豐樂多諸珍寶人
民熾盛志性仁和慈孝忠順唯願聖王於此
治正我等當給使左右承受所治當時輪王
語小王言止止諸賢汝等則為供養我已但
當以正法治化勿使偏枉無令國內有非法
行身不煞生教人不煞生偷盜邪婬兩舌惡
口妄言綺語貪瞋嫉妬邪見之人此即名為
我之所治時諸小王聞是語已即從大王巡
行諸國至東海表次行南方西方北方隨輪

所至其諸國王各獻國土亦如東方諸小王
比此閻浮提所有國名曰沃壤豐樂多出珍
寶林水清淨平廣之處輪則周行封地圖度
東西十二由旬南北七由旬天神於中夜造
城郭其城七重七重欄楯七重羅網七重行
樹周而校飾七寶所成乃至無數衆鳥相和
造此城已金輪於城中圖度封地東西四由
旬南北二由旬天神於中夜造宮殿七寶所
成乃至無數造宮殿已聖王踊躍而言此金
輪寶真為我瑞我今真為聖王是為輪寶成
就云何名為白象寶還清旦殿上坐自然象
寶忽現在前其毛純白七處平住力能飛行

其首雜色六牙織臙真金間填時王見已念
言此象賢良即試調習諸能悉備即乘其上
清旦出城周行四海食時已還時王踊躍此
真我瑞是為象寶云何名為駙馬寶成就還
清旦殿上坐自然馬寶忽現在前身駙青色
珠駿尾色頭頸如象善能飛行時王見已此
馬賢良即試調習諸能悉備即乘其上清旦
出城周行四海食時已還時王踊躍而言此
真我瑞是為馬寶成就云何名為神珠寶成
就還清旦殿上坐自然神珠忽現在前質色
清徹無有瑕穢時王見此神珠妙好若有光
明可照宮內時王欲試即召四兵以此寶珠

置高幢上於夜冥中賈幢出城其珠光明照
一由旬城中人民皆起作務謂為是晝時王
踊躍而言此真我瑞是為神珠寶成就云何
名為玉女寶成就時玉女寶忽然出現顏色
姿容面貌端正不長不短不麤不細不白不
黑不剛不柔冬則身溫夏則身涼舉身毛孔
出旃檀香口出憂鉢羅華香言語柔輒舉動
安詳先起後坐不失宜則時王見已心不暫
捨況復親近踊躍而言此真我瑞是為玉女
寶成就云何名為居士寶成就時居士丈夫忽
然自出寶藏財富無量居士宿福眼能徹視
地中伏藏有主無主皆悉見知其有主者能為

擁護其無王者取給王用時居士寶往白王言
大王有所給無不足為憂我自能辦聖王欲
試即勅嚴船於水遊戲告居士曰我須金寶
汝速與我居士報曰大王小待須至岸上王
言正尔須寶時居士寶即於船上長跪以右
手內著水中寶瓶隨出如虫緣樹彼居士寶
亦復如是內之水中寶緣手出充滿船上而
白王言向須寶者為須幾許時王語言止止
吾無所須向相試耳聞王語已尋以寶物還
沒水中聖王踊躍而言此真我瑞是為居士
寶成就云何名為王兵寶成就時王兵寶忽
然出現智謀雄猛英略獨決即詣王所白言

大王有所討罰不足爲憂我自能辦王欲試
兵卽集四兵而告之曰汝今用兵未集者集
已集者放未嚴者嚴已嚴者解未去者去已
去者住時主兵寶卽令四兵依如王語王見
踊躍而言此真我瑞是爲轉輪聖王七寶成
就謂四神德一長壽不夭無能及者二身強
無患無能及者三顏容端正無能及者四寶
藏盈溢無能及者王化國人慈育民物如父
愛子國民慕王如子仰父所有珍奇盡以貢
王願垂納受在意所與時王報曰且止諸人
吾自有寶汝可自用王之國土安隱豐樂平
正如掌衣食自然不須營覓唯行十善不爲

非法猶如北單不可具述 又十誦律云有阿耨
達池縱廣五十由旬繞池四邊種種果樹善住象
王宮殿住處有八千象以為眷屬若轉輪聖王出
於世時八千象中最下小者出為象寶給輪王乘
又外大海內洲有月明山婆羅醯馬王宮殿住處
有八千馬以為眷屬若輪王出於世時八千馬中
最下小者出為馬寶給輪王乘 又起世經云此
象馬寶於一日中暫受調伏堪任眾事為試象
馬於其晨朝日初出時乘此象寶等周迴巡歷遍
諸海岸盡大地際既周遍已是轉輪王還至
本宮乃進小食 又大樓炭經云轉輪聖王
有四種一者大富珍寶田宅奴婢等天下無

有如王者二者王最端正姝好顏色無比天下無有如王者三者王常安隱無有疾病亦無寒熱諸所飲食皆安隱四者王常安隱長壽天下無有如王者是為轉輪聖王四德具足七寶如法 又薩遮尼軋子經云佛言大王當知轉輪聖王復有七種名為轉寶所有功德少前七寶何等為七一劍寶二皮寶三牀寶四園寶五屋舍寶六衣寶七足所用寶第一劍寶者輪王所用國內若有違王命者彼劍寶即從空飛往諸小王見即降伏拜第二皮寶者此海龍王皮出大海中廣五由旬長十由旬體淨鮮潔光曜白日火燒不焦

水漬不爛猛風吹不能動體含溫涼能却寒
熱隨王去虬皮寶亦去所有士衆滿十由旬
遍覆其上能作別屋不相妨礙第三牀寶者
王所用牀立能平正柔軟得所若王入禪即
入解脫禪定三昧能滅貪瞋癡女人見王坐
寶牀者即皆得離貪瞋癡心第四園寶者入
彼園時即得定心若王欲受五欲樂時依王
所行善業功德諸天界中所有華果池河戲
樂之具自然隱沒現於王前第五屋舍寶者
王入彼屋欲見日月星宿所有殊異珍玩伎樂
屋中悉聞即離憂惱一切疲勞於睡眠中極
受快樂第六衣寶者王所有衣無如世間絹

布絲縷縱廣文章第一柔軟一切塵垢不能
點汙著彼寶衣即離寒熱飢渴病憂而水火
刀等所不能損第七足所用寶者所謂鞞等
若王著者涉水不沒入火不燒雖復遠行百
千由旬不覺疲極是名輪王七種軟寶是十
善中少分習氣功德非正具足十善業道

又中阿含經云若轉輪王出於世時當知有
此七寶出世如是如來無所著等正覺出於
世時當知亦有七支寶出於世間云何為七
一念覺支寶二擇法覺支寶三精進覺支寶
四喜覺支寶五息覺支寶六定覺支寶七
捨覺支寶

如賢愚經云佛告比丘過去無量阿僧祇劫
此閻浮提有一大王名瞿薩離典四天下有
八万四千小國有二万夫人姪女一万大臣
時王頂上欵生一炮其形如璽淨潔清徹亦
不疼痛後大如瓠便劈看之得一童子甚為
端正大王已崩頂生為王七寶具足衣食音
樂自然作樂經八万四千歲時有夜叉踊出
殿前高聲唱言東方有國名弗婆提其中豐
樂快善無比大王可往王即悅意欲行金輪
復轉躡虛而進群臣七寶皆悉隨從既至彼
土諸小王等盡來朝賀王於彼國五欲自恣
經八千歲夜叉復言西方有國名瞿耶王

可至彼還如前去經十四億歲夜又復唱此
方有國名鬱單曰王可到彼還如前去經十
八億歲夜又復唱有四天王覩其樂難量王
可遊之王與群臣及四種兵乘空而上四天
遙見其甚懷恐怖即合軍衆出外拒之竟不柰
何頂生於中優遊受樂經十億歲意中復念
欲升忉利即與群臣蹈虛登上時有五百仙
人住在須彌山腹王之象馬屎尿下落汗仙
人身諸仙相問何緣有此中有智者告衆人
言吾聞頂生王欲上三十三天必是象馬失
此不淨仙人忿恨便結神呪令頂生王及其
人衆悉住不轉王後知之即立誓願若我有

福斯諸仙人悉皆當來承王威感五百仙人
盡到王邊扶輪御馬共至天上未到之頃遙
覩天城名曰快見其色激白高顯殊特此快
見城有千二百門諸天怖畏悉閉諸門者三
重鐵關頂生兵衆直趣不疑王即取貝吹之
張弓扣彈千二百門一時皆開帝釋尋出與
共相見因請入宮與共分坐天帝人王貌類
一種其初見者不能分別唯以視瞬遲疾知
其異耳王於天上受五欲樂盡三十三天末
後欲害帝釋獨霸爲快惡心已生尋即墮落
當本殿前委頓欲死諸人來問頂生荅曰統
領四域三十億歲七日雨寶及在二天兩無

狀足故致墮落阿難又問此頂生王宿殖何
福而獲大報佛告之曰乃往過去不可計劫
時世有佛号曰弗沙與其徒眾遊化世間時
婆羅門子適欲娶婦手把大豆當用散婦是
其曩世俗之家禮於道值佛心意歡喜即持
此豆悉散於佛四粒入鉢一粒
緣受無極福四粒入鉢王四天下一粒在頂
受樂二天 又頂生王故事經云尔時頂生
適生是念即於釋提桓因坐處墮閻浮提及
四部兵退失神足舉身皆痛如人欲死時七
寶等皆亦命終尔時大王五處親屬皆悉雲
集往頂生所白頂生曰大王命終後苦備有

尔時頂生王者即我身是當知乃至五欲而無厭足染著聚集貯欲無厭所謂足者至賢聖道然後乃足尔時世尊便說偈言

不以錢財業

覺知欲厭足

樂少苦惱多

智者所不為

設於五欲中

竟不愛樂彼

愛盡便得樂

是三佛弟子

食欲拘利歲

終便入地獄

本欲安所生

命為苦所切

諸法悉無常

生者必壞敗

生生悉歸盡

彼滅第一樂

尔時尊者阿難聞佛所說

歡喜奉行

又起世經云輪王捨命必生

天上與三十三天同處共生命終已後始經

七日七寶並皆隱沒

育王部第五

如雜阿含經云。爾時世尊晨朝著衣持鉢。共諸比丘入王舍城乞食。時彼世尊光相普照。如千日之焰。順邑而行。時彼有兩童子。一者上姓。二者次性。共在沙中嬉戲。一名闍耶。二名毗闍耶。遙見世尊來。三十二大人相莊嚴。其體時闍耶童子心念。我當以麥。麩手捧。細沙著世尊鉢中。時闍耶合掌隨喜。而發願言。以惠施善功德。令得一天下。繖蓋王。即於此生。得供養佛。乃至得成無上正覺。故世尊發微笑。相。爾時阿難見世尊微笑。即便合掌向佛。白言。世尊非無因緣。而發微笑。世尊以何因緣。而發微笑。爾時世尊告阿難曰。我今笑。

者其有因緣阿難當知我滅度百年之後此童子於巴連邑統領一方為轉輪王姓孔雀名阿育正法治化又復廣布我舍利當造八万四千法王之塔安樂無量衆生如偈所說於我滅度後是人當作王孔雀姓名育於此閻浮提獨王世所尊辟如頂生王

佛告阿難取此鉢中所施之沙捨著如來經行處今當生彼處阿難受教即取鉢沙捨經行處阿難當知於巴連弗邑有王名日月護彼王當生子名曰頻頭婆羅當治彼國彼復有子名曰修師摩時彼瞻婆國有一婆羅門女極為端正令人樂見為國所珍諸相師輩

見彼女相即記彼女當爲王妃又生二子一
當領一天下二當出家學道當得聖迹時婆
羅門聞彼相師所說歡喜無量即莊嚴女嫁
與此王王見其女端正有德即爲夫人前夫
人及諸嫖女見其夫人來作是念言此女端
正國中所珍王棄捨我等乃至目所不視諸
女即使學習剃毛師業彼悉學已爲王料理
鬚髮料理之時王大歡喜即問彼女汝何所
求欲女啓王言唯願王心愛念我耳如是王
啓時王言我是刹利灌頂王汝是剃毛師云
何得愛念汝彼女白王言我非是下姓生乃
是高婆羅門之女相師語我父云此女應嫁

與國王是故來至此耳王言若然者誰令汝
習下劣之業女啓王言是舊夫人媠女令我
學此王即勅言自今勿復習下業王即立為
第一夫人王恒與彼自相娛樂仍便懷體月
滿生子生時安隱母無憂惱過七日後立字
名無憂又復生子名曰維憂無憂者身體鹿

澀

以其施沙
得相似果

父王不大附捉情所不念又王

欲試二子呼賓伽羅阿時婆羅門言和尚觀
我諸子於我滅後誰當作王婆羅門言將此
諸子出城金殿國館中於彼當觀其相乃至
出往彼園時阿育王母言承王出向金殿園
館中觀諸王子誰當作王汝今云何不去阿

育啓言王既不念我亦復不樂見我母復語
言但往彼所阿育復啓母言今便往去願母
當送飯食母言如是當出城門時逢一大臣
名曰阿菟羅陁此臣問阿育言王子今至
何所阿育荅言聞大王出金殿園館觀諸王
子於我滅後誰當作王今往詣彼王先勅大
臣若阿育來者當使其乘老鈍象又復老人
為眷屬時阿育乘是老象乃至園館中於諸
王子中地坐時諸王子各下飯食阿育母以
瓦器盛酪飯送與阿育如是諸王子各食飲
食時父王問師言此中誰有王相當紹我位
時彼相師視諸王子見阿育具有王相當得

紹位我若語言王愁不樂即語言我今摠已
王報言如師所教師言此中若有乘好乘者
是人當作王時諸王子聞彼所報各念言我
乘好乘時阿育言我乘老象我得作王又言
此中有第一座者彼當作王諸王子各相謂
言我坐第一座阿育言我今坐地是我勝座
我當作王又言此中上器食者此當作王乃
至阿育念言我有勝乘勝座勝食時王觀子
相畢便即還宮時阿育母問阿育言誰當作
王婆羅門記誰耶阿育啓言上乘上座上器
上食當作王王子自見當作王老象為乘以
地為座素器盛食粃米雜酪飯時彼婆羅門

知阿育當作王數修敬其母其母亦重餉婆
羅門若子作王者師當一切善得吉利盡形
供養時頻頭羅王邊國德义尸羅反時王語
阿育汝將四兵衆代彼國王子去時都不與
兵甲時諸從者白王子言今往伐彼國無有
軍仗云何得平阿育言我若爲王善根果報
者兵甲自然來應發是語時尋聲地開兵甲
從地而出即將四兵往伐彼國時彼諸國人
民間阿育來即平治道路莊飾城郭執持吉
瓶之水及種種供養奉迎王子而作是言我
等不反大王及阿育王子然諸臣輩不利我
等是故違背聖化即以種種供養王子請入

城邑平此國已又使至伐佉沙國時彼二大力士爲王平治道路諸天宣令阿育當王此天下汝等勿興逆意彼國王即便降伏如是乃至平此天下至於海際時父王得重疾王語諸臣吾今欲立修師摩爲王令阿育往至彼國時諸臣欲令阿育作王以黃物塗阿育體及面手脚已諸臣白王言阿育王子今得重疾諸臣即便莊嚴阿育將至王所今且立此子爲王我等後徐徐當立修師摩爲王時王聞此語甚以不喜默然不對時阿育心念口言我應正得王位諸天自然來以水灌我頂索繒繫首時王見此相貌極生愁惱即便

命終阿育王如禮法殯父王已即立阿菟樓
陀為大臣時脩師摩王子聞父崩背今立阿
育為王心往不忍即集諸兵而來伐阿育阿
育王四門中二門安二力士第三門安大臣
自守東門時阿菟樓陀作機關木象又作阿
育王形像如騎象安置東門外又作無煙火
坑以物覆之脩師摩既來到阿菟樓陀大臣
語脩師摩王子欲作王者阿育在東門可往
伐之能得此王者自然得作王時彼王子即
趣東門即墮火坑便即死亡有一大力士名
曰跋陀申陀聞脩師摩終亡馱世將無眷屬
於佛法中出家學道得阿羅漢時諸大臣輩我等

共立阿育爲王故輕慢於王不行君臣之禮
王亦自知諸臣輕慢於我時王語諸臣曰汝
等可伐花果之樹殖於荆棘諸臣荅曰未嘗
見聞却除花果而殖刺樹而應除伐荆棘樹
而殖果實乃至二三勅令伐彼亦不從尔時
國王忿諸大臣即持利劍煞五百大臣又時
王將姝女眷屬出外園中遊戲見一無憂樹
花極敷盛王見此花樹與我同名心懷歡喜
王形體醜陋皮膚鹿澀諸姝女輩心不愛王
憎惡王故以手毀折無憂花樹王從眠覺見
無憂樹花狼藉在地心生忿怒繫諸姝女以
火燒煞王行暴惡故曰暴惡阿育王時阿菟

樓陀大目白言王不應為是法云何以手自
煞人諸臣姝女王今當立屠煞之人應有可
煞以付彼人王即宣教立屠煞者彼有一山
名曰耆梨中有一織師家織師有一子亦名
耆梨凶惡搗打繫縛小男小女及捕水陸之
生乃至拒逆父母是故世人傳云凶惡耆梨
子時王使語彼汝能為王斬諸凶不彼荅曰
一切閻浮提有罪者我能淨除況復此一方
時彼使輩還啓王言彼人已得王言覓將來
耶諸使呼彼荅言小忍先奉辭父母具說上
事父母言子不應行是事如是三勅彼生不
仁之心即便煞父母已然後乃至諸使問曰

何以經人不速來耶時彼凶惡具說上事以
具啓王王即勅彼我所有罪人事應至死汝
當知之彼啓王言爲我作舍王爲作舍極爲
端嚴唯開一門亦極精嚴於其中間作治罪
之法狀如地獄彼凶惡人啓王乞願若人來
入此中者不復得出王荅言當以與願彼諸
徒主往詣寺中聽諸比丘說地獄事時有比
丘至誦地獄經有衆生生地獄者以熱鐵鉗
鉗開其口以熱鐵丸著其口中次融銅灌口
復以鐵斧斬截其體次復杻械枷鎖檢繫其
身次復火車鑪炭次復鐵鑊次復灰河次復
刀山劔樹具如天五使經所說彼徒主具聞

比丘說是諸事開其任處所作治罪之法如
彼所說案此法則而治罪人又一商主入海
十年採諸重寶還到本鄉道中值五百群賊
煞於商主商主之子見父死及失寶物猷世
出家遊行諸國次至巴連弗邑過此夜已晨
朝著衣持鉢入城乞食誤入屠煞舍中時彼
比丘遙見舍裏火車鑪炭等 沿諸衆生如地
獄中尋生恐怖衣毛皆豎便欲出門時凶惡
主即往執彼比丘言入此中者無有得出汝
今此死比丘聞說心生悲毒泣淚滿目凶主
問曰汝云何如小兒啼尔時比丘以偈荅曰
我不恐畏死 志願求解脫 所求不成果

是故我啼泣

人身極難得

出家亦復然

遇釋師子王

自今不重覩

爾時凶主語比丘曰汝今必死何所憂惱比丘復以哀言荅云乞我少時生命可至一月彼凶不聽如是日數減止七日彼即聽許時此比丘知將死不乂勇猛精進坐禪息心終不能得道至於七日時王宮內人有事至死送付凶惡之人令治其罪凶惡將是女人著曰中以杵搗之令成碎沫時比丘見是事極獸惡此身嗚呼苦哉我不乂亦當如是而說偈言

嗚呼大悲師

演說正妙法

此身如聚沫

於義無有實

向者美色女

今將何所在 生死極可捨 愚人而貪著

係心緣彼處 今當脫鎖木 今度三有苦

畢竟不復生 如是勤方便 專精修佛法

斷除一切結 得成阿羅漢 時彼凶惡

人語此比丘期限已盡比丘問曰我不解尔

之所說彼凶荅曰先期七日今既已滿比丘

以偈荅曰 我心得解脫 無明大黑闇

斷除諸有蓋 以煞煩惱賊 慧日今已出

鑒察心意識 明了見生死 今者愚人時

隨順諸聖法 我今此身骸 任尔之所為

無復有恡惜 尔時彼凶惡主執彼比丘

著鐵鑊油中足與薪火火終不然假使然者

或復不熱。凶主見火不然，打拍使者而自然。
火火即猛盛，久久見開鐵鑊。蓋見彼比丘鐵
鑊中蓮華上坐，生希有心，即啓國王。王即便
嚴駕，將無量眾來看比丘時，彼比丘調伏時
至，即身升虛空，猶如鷹王。示種種變化，如偈
所說：

王見是比丘

身升在虛空

心懷大歡喜

合掌觀彼聖

我今有所白

意中所不解

形體無異人

神通未曾有

為我分別說

修習何等法

令汝得清淨

為我廣敷演

今得勝妙法

我了法相已

為汝作弟子

畢竟無有悔

時彼比丘而作是念：我今伏是王，多有所導。

攝持佛法當廣分布如來舍利安樂無量衆
生於此閻浮提盡令信三寶以是因緣故自
顯其德時阿育王聞彼比丘所說自於佛所
生大敬信又白比丘言佛未滅度時何所記
說比丘荅言佛記大王於我滅後過百歲之
時於巴連弗邑有三億家彼國有王名曰阿
育當王此閻浮提爲轉輪王正法治化又復
宣布我舍利於閻浮提立八万四千塔佛如
是記大王然大王今造此大地獄煞害無量
民人王應慈念一切衆生施其無畏令得安
隱時彼阿育王於佛所極生敬信合掌向比
丘作禮我得大罪今向比丘懺悔我之所作

甚爲不可願受我懺勿復責我愚人今復歸
命時彼比丘度阿育王已乘空而化時王從
彼地獄出凶惡白王言王不復得去王曰汝
今欲煞我耶彼曰如是王曰誰先入此中荅
曰我是王曰若然者汝先應取死王即勅人
將此凶惡主著作膠舍裏以火燒之又勅壞
此地獄施衆生無畏 又雜阿含經云阿育
王言我今先當供養所覺菩提之樹然後香
美飲食施設於僧勅諸日唱令國界王今捨
十萬兩金布施衆僧千甕香湯漑灌菩提樹
集諸五衆時王子名曰拘那羅在右邊舉二
指而不言說意欲二倍供養大衆見之皆盡

發笑王亦發笑而語言嗚呼王子乃有增益
功德供養王復言我復以三十萬兩金供養
衆僧復加千甕香湯洗浴菩提樹時王子復
舉四指意在四倍時王瞋恚語諸臣曰誰教
王子作是事與我興競臣啓王言誰敢與王
興競然王子聰慧利根增益功德故作是事
耳時王右顧視王子白上座耶舍曰除我庫
藏之物餘一切物閻浮提夫人嫫女諸臣眷
屬及我拘那羅子皆悉布施賢聖衆僧唱今
國界集諸比丘衆而說偈言
除王庫藏物 夫人及嫫女 臣民一切衆
布施賢聖僧 我身及王子 亦復悉捨與

時王子座及比丘僧以麝香湯洗浴菩提樹
時菩提樹倍復嚴好增長茂盛以偈頌曰

王浴菩提樹 無上之所覺 樹增於茂盛

柯條葉柔軟

時王及諸群臣生大歡喜

時王洗浴菩提樹已次復供養衆僧時彼上
座耶舍語王言大王今有大比丘僧集當發
淳信心供養時王從上至下自手供養復以
三衣并四億萬兩珍寶觀五部衆願已復
以四十億萬兩珍寶贖取閻浮提宮人嫖女
及太子群臣阿育所作功德無量如是

又雜阿含經云阿育王問諸比丘言誰於如
來法中行大布施諸比丘白言給孤獨長者

最行大施王復問曰彼施幾許寶物比丘答
曰以億千金王聞是已彼長者尚能捨億千
金我今爲王何緣復以億千金施當以億百
千金施時王起八万四千佛塔於彼一一塔
中復施百千金復作五歲大會會有三百千
比丘用三百億金供養於彼彼衆中第一分是
阿羅漢第二分是學人第三分是真實凡夫
除私庫藏此閻浮提夫人嫫女太子大臣施
與聖僧四十億金還贖取如是計校用九十
六億千金乃至王得病欲以滿億百千金作
功德今願不得滿足便就後世時計校前後
所施金銀珍寶唯減四億未滿王即辦諸珍

寶送與雞雀寺中法益之子名三波提爲太子諸臣等啓太子言大王將終不久今以此珍寶送與寺中今庫藏財寶以竭諸王法以物爲尊太子今宜斷之勿使大王用之時大王自知索諸物不復能得所食金器送與寺中時太子今斷金器勅以銀器王食已復送寺中又斷銀器給以銅器王亦送寺中又斷銅器給以瓦器時大王手中有半阿摩勒果悲淚告諸大臣今誰爲地主時諸臣啓白大王王爲地主王即說偈答曰汝等護我心何假虛妄語我今坐王位不復得自在阿摩勒半果今在於我手此即是我物

於是得自在 嗚呼尊富貴 可厭可棄捨
先領閻浮提 今一旦貧至 如恒河駛流
一逝而不反 富貴亦復然 逝者不復還
時阿育王呼侍者言汝今憶我恩養汝持此
半阿摩勒果送雞雀寺中作我意禮拜諸比
丘僧足白言阿育王問評諸大眾我是阿育
王領此閻浮提閻浮提是我所有今者預盡
無有財寶布施衆僧於一切財而不得自在
今唯此半阿摩勒果我得自由此是最後布
施檀波羅蜜哀愍我故納受此施今我得供
養僧福時彼使者受王勅已即持此半果至
雞雀寺中至上座前五體投地作禮長跪合

掌具向上座說前王教時彼上座告諸大眾
誰聞是語而不厭世時彼上座今此半果一
切衆僧得其分食即教令研磨著石榴羹中
行已衆僧一切皆得周遍時王復問傍臣曰
誰是閻浮提王臣荅王言大王是也時王從
卧起而坐願望四方合掌作禮念諸佛德心

念口言我今復以此閻浮提施與三寶隨意
用之時王以此語盡書紙上而封緘之以齒
印印之作是事畢便即就盡尔時太子臣民
堊送王已諸臣欲立太子紹王位中有大臣
名曰阿菟羅陀語諸臣曰不得立太子爲王
大王在時願滿億百千金作諸功德唯減四

億不滿億百千以是之故全捨閻浮提施與
三寶欲令滿足今是大地屬於三寶云何而
立太子為王時諸臣聞已即送四億金送與
寺中即便立法益之子為王名三波提 頌曰
眷業澄暉 宿祐因淨 七寶來投 千子威併
十善御宇 四洲歸正 無思不愜 有意斯盛
秉式康衢 昆蟲養性 八方增壽 四八光瑩
鬼神翔衛 不言而令 樂哉至矣 輪王顯聖

法苑珠林卷第四十三

漆

